

## THUZUITE KIPAWLNA TUAMTUAM

### *Associations of the Faithful*

Thuzuimi akua mapeuh in kipawlna tuamtuam phuankhia thei a, tua in amau te *pianpihneih tanh* (*natural right*) ahih nathu Laisiangtho in hici bangin nagen hi:

Tua ciangin Pasion in, "Eima lim, eimah hong sunin mihing bawlni. Tuipi ngasate tung, huihlak vasate tung, gan hingte tung leh leitunga a bokvakte khempeuh tungah ukna neisak ni," a ci hi. Tua ahih ciangin Pasion in ama lim bangin mihing piangsakin, Pasion' lim bangin amah a piangsak hi. Amah in pasal leh numei a piangsak hi. Pasion in amaute thupha pia a, amaute tungah, "Ci pha-in tampi pha unla, leitung dimin zo un. Tuipi ngasate tung, leitungah agamtang, anungta te khempeuh tungah ukna neita un," (Piancil 1:26-28) aci hi.

Pasion deihna te lungngai in, Pawlpi in zong thuzui mite' ki pawlna tuamtuam te pen athu pi mahmah Pawlpi nuntakna leh kilamna khat hi ci-in, na ciamteh hi. Tua kipawlna tuam tuamte tawh kisai Pawlpi *Canon Law* sungah anuai a bangin na gelhhi:

Pawlpi sungah, anuntakna uh ki-apsianga akipiakhia kipawlna [religious congregations te cihdan] leh Pasion thutango theihnang ki pawlna (societies of apostolic life [gentehna in PIME, MEP]) te a hilo, kipawlna tuamtuam om hi. Tua kipawlna te pen Pawlpi thuzui mi ahi, Siampi te ahi a, thuzui mi khat in ahi zongin, Siampi leh thuzui mi kipawl in ahi zongin, Christian nuntakna apicin semsem theihna ding leh, Christian upna leh biakpiakna te akhantoh semsem theih na ding, Pasion nasepna sepkhoptheihna ding, adiadiak in Pasion thutangkona ah tha le ngal te gawmkhawm in nasep khoptheihna ding leh ki-itna nasep, thuzui mite kha tha hatnang nasep (works of piety) te sepkhoptheihnang leh, Christian lungsimtawh kituakin leitung maitang zemin thak

suahtheihna dingin, tua kipawlna tuamtuam te kiphuan khia thei hi.

Mihing in kiim le paam tawh kizom nuntakna anei dingin Pasian hongbawl ahihi. "Tua kizop nuntakna in, mihingte tungah akibehlap nakhat (thu khat) ahi kei hi. ... Midangte tawh kizopna, khat le khat kikal kizopna vaipuak neihna leh sanggam ki-itna lungsimtawh kiho, kikapna te hangin, mihing te in amau tungah akipia letsongte khangcing leh picingsak semsem in, anunung ciangin mihing te lamtawp ahi Pasian gamnuam nuamtak in atungding ahihi." Eite in Pasian i um a, i umkei zongin, i deihi a, i deihkei zongin, mihing ngeina leh pianzia in (interdependence) khat le khat tungah akinga nuntakna neihloh apha mawh ahihi. Eite in kizopnuntak na anei dingin hongki piangsak ahih mah bangin, Jesu Topa in ama Pawlpi pen Alianbel Siampipa, Siadaw te leh amahmah tawh kipumkhat in akipawl ahi ki pawlna pi-in hongphuan khia hi. Canon 215 na ah, "ki-itna nasep septheih nading, biakna le upna thu ah khanton theih nading leh, hih leitungah Christian nuntakna aki lapsang semsem theihna ding" in ki pawlna tuamtuam phuatkhiaikhuan in, eite pianpihneih tanh ahihna thu na ciamteh hi. Hih canon law sungmah ah, tua kipawlna te ii ngimna leh geelna te vaihawmna dingin kikapna tuamtuam te suaktatak in bawlthei ahih nazong nacianteh hi. Mihingte'n kizopnuntakna i neihna te lungngai in, ngimna khat nuai ah tua kipawlna tuamtuam te ki uktheih nading in, Pawlpi in thukhun (law) te hongbawlsak hi.

### ***Thuzui te kipawlna tuamtuam: Athutawh kituak akhiatna***

Kipawlna khat, tua kipawlna in Pawlpi nasepna tawh kituak nasepna hi-in, tua kipawlna suaktatak in aphuankhia mite in, tua kipawlna ii aneih ding, a ngahding thu te semkhia in, amau te vaipuakte zong amau te ii pianzia leh hihna te (the status of the person) tungah kikhelna omsak lo in, phuankhia thei hi.

Thuzuite kipawlna i cih in, mihing kipawlna hi-in, nate ki pawlna hilo hi. Christian thuzui mite in "ki-itna nasep sep theih nading, biakna le upna thu ah khantontheih nading leh, hi leitungah Christian nuntakna aki lapsang semsem theihna ding; tua kipawlna te ii ngimna leh gelna te vaihawm nading in kikapna tuamtuum te suaktatak in bawltheih nadingin, kipawlna tuamtuum phuankhia thei leh tua kipawlna te makaih in kemcing thei" (Canon 215) ahih na thu in, amaute pianpih neih tanh ahihi. Tua kipawlna in, van leh na te (kipawlna ii neihsing Sum le van tuamtuum) zontheihna, keptheihna leh amau te ngimna gelna te atangtun theihna dingin sumzonna (Fund sum zonna) te bawlthei hi. Ahi zongin, tua ki pawlna in mihing te hangin a om ahih manin, aneih uh angah uh vante hanga kipawlna a om hilo hi. Kipawlna khat peuhpeuh ii ngeina leh deihna mahmah in, tua kipawlna sunga om mimal khatciat in, kipawlna ii ngimna leh gelna te apicingtak a angahtheihnung hanciamding ahihi. Pawlpi pualam ah ki pawlna tampi om a, ahi zongin tua kipawlna te in Christian thu bulphuh kipawlna a omtheih mahbangan, Christian upna atawh kisai lo kipawlna zong tampi mah om hi. Tua thu tawh kileh bulh in, thuzuite kipawlna in, angeina leh apianzia mahmah hangin, Pawlpi ii nasepna tawh kithuhual kithu ton in, Pawlpi nasepna tawh kipawlna ii ngimna leh gelna te akibangdingin kemcing den hi.

***Pawlpi Thuneihna Aneite leh Thuzui mite Kipawlna***  
*(Ecclesiastical Authority and Associations of the Faithful)*

Thuzui mite kipawlna in Pawlpi nasepna tawh kituakleh kiton tawntungding a, Pawlpi ngimna le gelna te tawh deihna khat ah na semkhawmding cihthu ahih manin, Pawlpi sungah akicing thuneihna anei mite in, upna tawh kisai thu, gamtat natawh kisai thu leh Pawlpi thukhun leh paizia tawh kisai thute tungah atawntungin navak pilvak takin a omding vai puak lianpi nei uhhi. Hih pilvak nasep aneihna uh ii adeihna lianpi in, mitampi te phattuumna a om theihna ding, sepding

zuihding leh ngahding neihding thute tungah nawngkaisakna leh, gikeekna te a omloh nading, kisapna mun leh hun te ah akisam bangin apanpih theihna ding (cf. Canon 223) cihna ahihi. Hih pilvak nasepna in, Pawlpi sungah thuneihna kicing anei mite in, kipawlna tuamtuum te tawh kisai in zuihding thukhun te tawh kituak in nasepna nei leh nei lo cih ahi a, tua kipawlna mahmah ii thukhun leh thubullet te mahmah enin kandel theihnading thuneihna anei ahihi (Canon 302, 1).

*Public associations* te tawh kisai in, tua kipawlna aphuan khia Pawlpi sungah thuneihna anei mi in tua kipawlna tungah thu nei pah hi. [*Public associations* cih pen Siampi pa zum pan, *Bishops' conference* pan leh *Diocesan bishop* cihte bek in phuankhia thei hi.] *Private association* ahih leh, Pawlpi sungah thuneihna anei mite in tua kipawlna te tungah thuneih na nei hi. Ahi zongin Pawlpi sungah thuneihna anei mite in tua ki pawlna ii suahtakna zong zahtaksak ding pello aphamawh ahihi. Pawlpi sungah thuneihna anei mite in "kipawlna ii hanciamna te amawk napi suaklo in, amau te Pasian nasep nate in mitampi phattuumna ahih tawntung nadingin enin, kemin, pilvaktak in lamlak dinghi (Canon 323, 2)". Tua bek thamlo in, Pawlpi sung thuneihna anei mi in, "tua ki pawlna ii neihsa van tuamtuum (sum le pai leh vanneih te) te in, tua kipawlna ii ngimna leh gelna tawh kituak in kizang hiam, kizanglo hiam cih hoihphatak in en in, sittel nading (Canon 325,1)" vaipuak zong anei ahihi.

### ***Kipawlna Namte (Types of Associations)***

Pawlpi sungah kipawlna nampi nih in kikhen a: Public leh Private ahihi. Hih nih nuai ah anam tuamtuum aneuneu om a, tua te hih i lai atna sungah i gengai zokei dinghi [cf. *Clerical associations (canon 302) and third orders (Canon 303)*].

"Thu ummi te kipawlna hi-in, tua kipawlna pen, Pawlpi sungah akicing thuneihna anei [leitungbup ai dingin, Alianbel Siampipa, Bishops' conference in amau uk gamhuam sung aiding, Diocesan bishop in ama diocese sungah] te bek in

aphuatkhiat leh tua kipawlna pen *Public association* kici hi (Canon 30,3)." Alianbel Siampipa zum pan, Siadawte ki pawlna ahi bishops' conference pan leh diocese a uk Siadaw te bek in *public association* akici thuzui mite kipawlna phuan khiathei bek hi (Canon 312). Tua kipawlna phuatkhiatna thu khun atangko ma in, tua kipawlna ii innpi (statutes) pen akicing thuneihna anei mi in kipsak masa dinghi (Canon 314). Tua *public association* bek in Pawlpi mintawh Christian upna thu hilkhuan, mipi biakpiakna tawh kisai te zong picingsak theihna nei hi. Banghanghiam cih leh tua te in, amau ii pianzia leh thuzung mahmah hangin, Pawlpi sung akicing thuneihna anei mite khutsungah akikoih thute ahihi (Canon 301,1). *Public association* ahih manin, tua sunga om mimal khatciat in tua kipawlna ii ngimna leh deihna te asepnah ah, Pawlpi min in nasem uhhi. Tua kipawlna in mi khempeuh tawh akisai thu ahih manin, tua kipawlna aphuan khia mi in, tua kipawlna tungah ukna nei a, adiakdiak in tua kipawlna amakaihding mi zong, tua kipawlna ii innpi (statutes) nuai ah teelthei, kipsak thei hi (Canon 317,1).

*Private association* ahih leh, *public association* tawh kibanglo hi. *Private association* in tua kipawlna sunga om thuzui mite in Canon 298, 1 (Canon 299,1) na tawh kituak in amau teng suaktatak in abawl uh thukimna hangin ahong piangkhia ahihi. Hih thu hangin, *private association* akici thu ummi te kipawlna in thuzui mite adingin ngimna khat sephkop bawlkhop theihnang in, kipawlkhawm nasep nadingah khak tanna atawmpenpen leh deihdan in ahoihpen dingin apuah ol penpen kipawlna ahihi. Pawlpi sungah akicing thuneihna anei mite in tua kipawlna (private associations) te tungah pilvak taka etcik theihnang thu aneih uhhangin, tua ki pawlna ii masuan, paizia te pen tua kipawlna ii innpi (statutes) tawh kituakin, tua kipawlna sunga om mite in bawlding uhhi (Canon. 321).

*Private association* sunga om mite in, amau te makai ding, nasemding te amau leh amau in suaktatak in teelding

uha, tua kipawlna ii neihsa van tuamtuam tezong suaktatakin zek in, amau te kha lam ah amakaih dingmi zong suaktatak mah in teelding uhhi. Ahi zongin tua khalam lakdingin ateel mi pen, tua kipawlna omna a, siadaw ukgam acing akem Siadawpi pa (amahtawh akizakim mi) in kipsak hamtang dinghi (Canon 324,425).

### ***Kipawlna min ah "Catholic" Vawhna***

Pawlpi thukhun tawh kizui in, kipawlna khatpeuhpeuh ahi a, Pasion ading nasepna khat peuhpeuh ah ahizongin, Pawlpi sungah akicing thuneihna anei te ii siangtak leh kilangtak a phalna lai ngahlo in, tua kipawlna te min dingin 'Catholic' cih min vawhthei lo dinghi (Canon 216; 300; 803,3; 808). Bang hangin hibangin thukhun kibawlhiam i cih ciangin, kipawlna khat peuh in Pawlpi min ahi Catholic apuak uhciang in, tua kipawlna in i Pawlpi mai tangleh, i Pawlpi' hong hilh thuman thutak upna te aman lo suaksak thei a, thu ummi tampi te adingin pukna leh paikhialhna suakthei ahih man ahihi. Hih thu hangin, kipawlna khat peuhpeuh in 'Catholic' cih min apuak nopa ahih leh, Pawlpi sungah thuneihna akicing anei te ii thukimpihna, lungkimpihna leh phalna lai angah masak ding kisam hi.

## **PAWLPI LE KIPAWLNA**